

Basef Amama Jems Nanda'ami

Basef bandami Jems nanda'ami

1:1-18 Amamaga meagwambipai

1:19-27 Ape' ina mome' basef Godi na'a, owa'. Meme'am mailam wapoti'.

2:1-26 Ape' monda' waf bu'unai ma nowalapa bale'ef ape'inai

3:1-12 Ape' mumafi malogof ape'imi andeande'

3:13-18 Gawa bu'unai nafi'i heveni

4:1-12 Ape' mope mofe' owina God

5:1-20 Waf bu'unai hianai ape' mielanai

1 ¹Ae' Jems, ape owina God naloma Dembinai Jisas Kraisa anda' maola amam atom. Anda' basef amama mafe'mago ipe' epes hipei Judaizei epes wambotogw loumi 12-peleim. Ipe' pakwaha wambel ofagama ipe'ima ma pafe' pape wambel hiagoma etap anae' pape panda' maol naninani. Ae' anda'mepago danifel nafe'mago ipe'.

Amamaga meagwambipei manda'epa pataga la'ifipa

²Ipe' sahin owan ae'ipei, maim nimeguf amamaga meagwambipei motagamepa, ukup ipe'imi mi'i andeande' pendanifel etin pepan. ³Dei' main, ipe' pegawa amama mogwamba bale'ef ipe'inai, amama manda'epa pitu la'ifipa ma nimanimi meagamipei. ⁴Ea' ipe' pitu la'ifipa ma waf anama neataga bo'ona ma ipe' ma anona nemaf petaga andeande' endilisi, waf aonai a'epa. Ama waf hianai Godi mope ipe', ea' ipe' ina anona waf bu'unai a'epa, owa'.

Emi egafis gawa bu'unai a'asi, esis sihali' God

⁵Emi egafis gawa bu'unai a'asi, esis sonda' beten sihali' Goda nose'asana. Dei' main, Anan nase'asa amamaga hiami na'a ma epes hiesi, ina ninifalisi, owa'. ⁶Epes isima esis sombale'efana endilisi ma sonda'

beten sohali'a God. Ina sope ukup biambiefim, owa'. Esis sombale'efana la'ifis. Emi egafis sape ukup biambiefimi, esis ina sembale'efana la'ifis, owa'. Ukup asasimi si'i embel uf nalo naoh mohafel. ⁷⁻⁸Epes isima ina ukup mi'i Dembinai nose'as anom amamaga, owa'. Ukup asasimi mandawal biefim mapoma waf hianai esis sanda'anai ea' ina sape ukup etifim, owa'.

Basef epes kwahusi saloma epes amamaga hiamisi

⁹Sahin owan Kristen emi egafis kwahusi esis sondanifel ma God nafelas nigiambas dei' anona nemaf wapoti'. ¹⁰Ape' Kristen emi egafis amamaga hiamisi, esis sondanifel ma God nanda'as safe' owina sembale'efa Kraisi. Dei' main, epes amamaga hiamisi anona nemaf soga' si'i afis mataga otalef mape nogota bandana ma mandala'of mowa. ¹¹Ipe' pegawa aon alipunai natefi ma owaf naha otalef amama ma ala'um hi'alam. Afis mataga mia'of ea' sosaf afisi nambimb mowa'. Epes isima amamaga hiamisi sonda'am na'ama etin. Nemaf anama sonda' maola bisnisi atom, soga' si'i sosaf afisi mowa.

Basefa hiahaom meagwambipei matagama epes

¹²Emi egafis saitu la'ifisa hiahaom meagwambasi matagamas, esis sondanifel. Dei' main, nemaf anama esis sikila' amama waf aonai naninani ea' hi'ilana, anona nemaf esis sofa' amamaga bu'wami si'i prais. Amama na'ama. Ambal namunai God na'i endilisi noso'asam emi egafis ukup maimaila anan. ¹³Emi egalini amamaga meagwambipei motagamen ma nonda' waf aonai, enin ina ni'i God nanda' enin dei' nanda' waf anama. God ina nanda' enin epen nanda' waf aonai, owa'. Ea' ina enis epes la'ifisa sonda'ana nonda' waf aonai, owa'. ¹⁴Ea' ukup awami ape'imi atom mafelapa makikipapa ma mafe' matolo'w isalef si'i anona mafin aolupunai nafe' natolo'w esag. ¹⁵Ea' ukup ape'imi mohafel manda'apa manda' waf aonai. Anona nemaf waf anama aonai notaga lu'una, nonda'apa moga'.

¹⁶Ipe' sahin owan, ae' okom nainailipa. Na'ama ipe' pembaso'ma ipe' etipa. ¹⁷Amamaga bu'wami hiami si'i presen, amama ahalomapa ape'inai nase'apam misila'i heven. Anan nanda' mafifili aon alipunai owambunai maloma ondowa motawa ilif otaga. Owaf naluwi, ambagof laom bandam. Ea' God ina nandaho'of na'ama si'i ambogof, owa'. Anan nape na'ama etin la'ela'ef hihif. ¹⁸Anan naila okom ananinai atona ma basef ananinai endilisimi ma ape' mataga mape mali'ma amamaga amama Anan nanda'ami.

Ape' mome' basef milam

¹⁹Ipe' sahin owan ae'ipei, ipe' ukup mopoma basef amama na'ama. Ipe' hipei pendandombam ulala peme' basef. Ea' ina pi'i anom basef pegwam

ulal, owa'. Ea' ina ukup wandafum mehip, owa'. ²⁰Dei' main, waf anama epes ukup wandafumanai nilai waf aonai. Ina nawalapai waf bu'unai Godi, owa'. ²¹Amama atom dei' ipe' kwahago waf aonai neloma waf aonai hianai hi'ilana. Waf anama aonai epes hiesi sanda'ana la'ela'ef. Ea' pinindifa ipe' pepe owina Goda pefa' basef amama ananiami mope opalef ipe'imi. Basef amama la'ifimi ma mofa'ai ipe' pitanima pifi'mai God.

²²I'i peme' basef Godi ina pailam, ipe' pambaso'ma ipe' etipa. Amama hapaimi. Ipe' peme'am pilam, andeande'. ²³Emi egafis seme' basef Godi owa' sieliam, esis si'i enis epes safela glas sati amagah asasimi. ²⁴Esis satolom ea', sandamboma safe', ina okokoma amagah asasimi, owa'. ²⁵Ea' basef mi'uli Godi matagahepa makwaha waf aonai, amama andeande'. Emi egalini niti mi'uli anama ofagema andeande' la'ela'ef nilam, epen inima God nofalo'man nonda'an nendanifela maina maol anan nanda'anai.

²⁶Emi egafin ni'i, "Ae' anda' lotu endilisi aila God" ma enin i'i owa' nimafi malogel ananinai andeande', epen inima nambaso'ma okom ananinai atona. Ea' dei' bale'ef ananinai ma lotu main falafunai atona. ²⁷Waf sanda' lotuwani bo'ona andeande' ofagena a'ana naep Ahalomapa ape'inai Godi, anama na'ama. I'i enis awasi mamasas a'asi esis etis sope, o nemata'w alifi'wi akwa'w ato'w kwape kwahu'wi, ape' migiambamasa otamba gwa'aimi maim. Ea' mumafi pe ape'inai andeande' ma waf aonai etapana'i ina nenda' opalef ape'imi motaga aom, owa'.

Ape' mimila epes hiesi dembesi awasi na'ama etin

2 ¹Sahin owan ae'ipei, ipe' pembale'efa Dembinai ape'inai Jisas Krais, Anan Dembinai nafifili endilisi. Ea' dei' ipe' ina pigiambama epes isima agufisi etis ea' pewa' alafugaha epes agof a'asi, owa'. Penda'am na'ama etin. ²Basef amama ofagema na'ama. I'i anona aman amamaga hiamunai nonda' trausis siot sosaf bu'wami nola ring gol faf ananinai ma nuwis ipat anama panda' lotuwani nomon, ma i'i anona aman kwahuna ma otamba luwaguf maim nuwis wapoti', ipe' atuwasi penda' maina anan? ³I'i ipe' penda' aman anama luwaguf maim bu'wami pi'ipana pi'i, "Ine' fi'i balata bu'unai na'ae", ama i'i aman anama kwahunai nuwisi pi'ipana pi'i, "Ine' nitu gani", o ni'i "Nepe gani etap felefele'ma bo'wagah ae'ami". ⁴I'i ipe' penda'am na'ama, atuwasi ofagema awami ipe'imi. Ipe' pawaloga sahin owan ipe'isi ma ukup ipe'imi, ea' ipe' ina pawalogas paila waf bu'unai na'ama etin, owa'. Ipe' pawalogasa ukup awami atom.

⁵Ipe' sahin owan ae'ipei, ipe' peme'! God nandandepa epes isima kwahusi ma otamba hiahaom maim ma dei' sape la'ifis sombale'efana la'ela'ef sape bo'wes andeande' si'i epes isima amamaga hiamisi. Anan nandandepasa sofa' amamaga bu'wami wambel Ananinai. Amamaga amama na'i basef endilisimi atom la'ifimi noso' emi egafis ukup maimaila

Godi. ⁶Ea' ipe' panda' epes isima kwahusi ambagof aom. Emi egafis sanda' ambagof ipe'imi aom sase'epa nimanimi sanda'mepa basef? Esis amamaga hiamisi. ⁷God nase'epa agel bu'unai Kraisi ea' ipe' Ananipei. Epes isima etis sa'i basef awami sanda' findiwama agel anama.

⁸Dembina King ape'inai numafi ape' hiapai, anan nase'apa basefa mi'uli Ananinai mape Buk Baibeli. Basef amama ma'iam ma'i, "Ipe' ukup mimila emi egafis sape felefele'ma ipe'i si'i ipe' ukup maimaila ipe' atona etin."

I'i ipe' pila mi'uli anama, penda' waf bu'unai andeande'. ⁹I'i ipe' pigiambama enis epes, pewa' alafugaha enis, mi'uli anama atona nanda' kotimipa ma panda' waf anama pesambala mi'uli anama. ¹⁰Dei' main, emi egafis sila basefa mi'uli hianai hi'ilana ea' sesambala anona mi'uli anama atotona anom basef tu'wanim kwaie'um, epes isima ofagema اساسيمي si'i sawala mi'uli anama hianai hi'alana. ¹¹Dei' main, anan na'i basef amama na'i, "Ipe' owa' peha enis epes sog'a." I'i ipe' owa' penda' waf anama so'a waolanai, ea' paha enin epen naga', ipe' pataga epes aopei pesambala mi'uli Godi.

¹²Anona nemaf God nowaloga ape' ma anona mi'uli nanda'apa mope wafifipa. Ea' la'ela'ef ipe' pi'i basef penda' waf nondahama mi'uli anama. ¹³Dei' main, emi egefis owa' siti uwahipis enis epes, owagama God ina niti epes isima uwahipisa nemaf anama nowaloga esisanai, owa'. Ea' emi egafis siti enis epes uwahipis, God anona nemaf ina nowaloga epes isima ni'i awes, owa'. Waf anama ape' mi'i uwahipisanai nikila' endilisi.

Bale'ef atona wafinai, waf bu'unai ina napeis, owa'

¹⁴Ipe' sahin owan ae'ipei, i'i enin epen ni'i, "Ae' embale'efa Kraisi" ma waf ananinai ina bo'ona, bale'ef ananinai falafunai atona. Bale'ef anama ina la'ifina ma anona nemaf God nofa'an notanimani, owa'. ¹⁵Bale'ef anama falafunai nape na'ama. I'i enis sahin owan sape sala luwaguf awami o gwa'aimi a'as, ea' ¹⁶enin epen ipe'ini ni'ipa epes isima ni'i, "Ipe' opalef awanem pefe' pefa'ai luwaguf ipe'imi pewahe'am pembaho' alop ipe'inai pefe' pea' gwa'aimi bu'wami!"

I'i ipe' pi'iam na'ama, basef amama ipe'imi ina mataga endilisi, owa'. Basef amama ipe'imi migiambamas mi'imama? Owa'etin. Falafumi atom. ¹⁷Bale'ef na'ama etin. I'i enin epen nembale'ef etin ina nanda' waf bu'unai naloma bale'ef ananinai, bale'ef anama ananinai falafunai atona.

¹⁸Ea' enin epen na'i, "Ine' epen nembale'efa Kraisi ea' ae' anda' waf bu'unai."

Dei' a'ipa epen inima na'ama a'i, "Ine' nihi'ambe bale'ef anama ine'inai waf bu'unai owa' neataga nelomana. Waf bu'unai ae' anda'anai ihi'ambena bale'ef ae'anai."

¹⁹Ine' nembale'efana na'ama na'i, "God atotona nape."

Ine! na'i na'ama, andeande!. Ambagof awami wapoti! mombale'efana na'ama etin ea' umbamaham bombol etin kwapete'am. ²⁰Ine! aman okom nahaga nagaolinai, ine! nembale'efa Jisas atona, ama ina nanda' waf bu'unai wapoti!, bale'ef anama ine'inai falafunai atona. Dei' ine! na'i negawa anama ofagema? Dei' i'ipina.

²¹Fowa! gani akunamapa ape'inai Abraham na'i nondolali ma nogalomana ananinai Aisak nondolalimana ma Goda balata anama sondolalima Goda. Amama atom dei' God na'ipana na'i anan aman bo'ona andeande!. Anan nanda' waf bu'unai dei' God na'ipana basef amama na'ama. ²²Ine! negawa o owa'? Bale'ef Abrahami naloma waf bu'unai anan nanda'anai amama manda' opeh etifigin. Ea' waf bu'unai anan nanda'anai nagiangbama bale'ef ananinai nataga alihina andeande!. ²³^bEa' basef amama mail buk Baibeli mataga alihim mandawalap. Basef amama ma'i, "Abraham nembale'efa God, dei' God nofalana na'i anan aman bu'unai andeande!."

Ea' God nofalana na'i, "Anan alupunai Ae'anai."

²⁴Basef amama mail buk Baibeli mihi'ambapa dei' ipe' pegawa bale'ef atona God ina na'i epes bo'wes andeande!, owa!. Esis sombale'ef endilisi ma sanda' waf bu'unai wapoti!, anan nofalas na'i epes bu'wasi andeande!.

²⁵^cNemata'w akwama Rahap kwanda' waf so'a waolanai, akwa'w na'ama etin. God nati waf bu'unai akwa'w kwanda'anai dei' okom napoma'w na'i akwa'w nemata'w bo'okw andeande!. Waf bu'unai akwa'unai kwagiambama amam Juda mandambaho' mafi'i ea' kwih'i'ambam anona eaf mafe' wafifim.

²⁶^dEa' basef amama mape na'ama. I'i alop atona ambal owa' nopaipa, alop anama naga' ea!. Na'ama etina emi egalin nembale'ef etin ma ina nanda' waf bu'unai, bale'ef epen inima falafunai atona.

Ape' mumafi malogof ape'imi

3 ¹Ipe' sahin owan ae'ipei, na'ama ipe' hipei petaga gawaipei tisa etipa, owa!. Dei' main, ipe' pegawa anona nemaf God nowaloga afa' tisa wawalipasa basef bu'wami Ananimi nowalogafa ma basef la'ifimi endilisi. Ea' enis Kristen nowalogas sa'osa'ombel. ²Ape' hiapai anom nimeguf owa' mila basef Godi andeande!, owa!. Ape' mowa ma anona waf aonai ape' manda'anai. I'i enin epen ina nanda' waf aonai ma basef ananimi, enin epen bu'wani. Enin la'ifina nimafi alop naloma okom ananinai hi'ilana wapoti!.

³Ipe' pegawa ape' manda' waf anama ma hos. Ape' masape' ain nape malogof hosi'

a 2:22 Hi 11:17,18 **b** 2:23 Ro 4:3,9,22; 2 Kro 20:7; Ais 41:8 **c** 2:25 Hi 11:31 **d** 2:26 Je 2:17 **e** 3:1 Lu 12:47 **f** Ain anama nape malogof hosi sa'ona hi'elina. Natoma hosi nahonde' mandof mehup ma nefe' wa'el hos neme' malegel ekep pehana nailana nafe!.

nomona monda' hos meme' basef ape'imi maila ukup ape'imi ma hos amama mefe' si'i ape' ma'i meafe'ma.

⁴Dei' ipe' ukup mopoma sip lu'unai. Sip anama lu'unai ea' uf lu'unai nefa' sip anama ea' stia anama so'una. Kepten numafi sipi nambomana nafe' anama anan na'i neafe'ma. Nanda'am na'ama ma stia anama so'unai. ⁵Ea' na'ama etina malogof ape'imi sa'om mape alop ape'inai nomon. Malagof amama ma'i basef mamumami hiami endilisi mafela agof epesi ma maol hianai esis sanda'anai.

Dei' ipe' okokoma nif. Nif fendom sa'om mataga lu'um la'ifim endilisi fendo aolop lawah lu'wami fendom hi'iam.

⁶Malogof amama ape'imi na'ama etin si'i nif fandumi mape la'afena alop ape'inai malogof amama mawalapa waf naninani aonai. Ea' manda' ukup epesi mataga aom sanda' waf aonai. Mawalapa waf hianai ape'inai ma fe' pe ki ape'inai aona endilisi si'i nif fandumi mataga lu'um. Nif amama mataga wambel aonai hel atogon.

⁷Mafis mamumami aolupumi maloma amiguf maloma iguf maloma amamaga hiami mape naoh embel owini, epes sofa'ami sali'atam sanda'am mogawa mame'as mape owina esis. Dei' wapoti' esis la'ifisa sanda'am na'ama.

⁸Ea' malogof epesi owa'etin. Ina enin epen la'ifina numafi malogol ananinai, owa'. La'ela'ef malogel nataneam nape la'ela'ef na'i basef awami si'i marasin aonai naha epes saga'i.

⁹Malogof ape'imi atom mafela agel Dembinai Ahalomapa ape'inai ea' ma'i basef awami wapoti' mahambombaga sahin owan ape'isi God nanda'as sape na'ama etin si'i Anan. ¹⁰Malogof amama atom ma'i basef bu'wami mafela agel Godi ea' ma'i basef awami wapoti'. Ipe' sahin owan ae'ipei, penda'am na'ama, owa'. ¹¹⁻¹²Sahin owan ae'ipei, anom basef womun etin na'ama. Ina embel bu'wami maloma awami motah ifata atotona, owa'. Ea' anona lawag fik ina nail nola anom su'utip oliv, owa'. Ea' anom mandelef su'utip grep mailami ina mail mola anom su'utip fik, owa'. Na'ama etin si'i embel naoh ina mandamboma motaga embel bu'wami, owa'.

Gawa bu'unai God atona nase'apana

¹³Ipe' emi egafipa gawa bu'unai hianai napaipei, ipe' pepe na'ama. Fe' ipe'inai nihi'ambas gawa ipe'inai enis epesa penda' waf bu'unai noloma maol bu'unai. Maol anama ipe' panda'anai pepe owina epes pila waf gawa bu'unainai. ¹⁴Ukup ipe'imi ina kowalepa ma pefa' amamaga hiahaom otamba maim enis epesi, owa'. Ipe' ina pefela agof ipe'imi, owa'. Ipe' penda' waf anama pi'i ipe' etipa gawaipei, ipe' pambaso'mas. Na'ama hapaimi. Gawa anama ipe'inai ina endilisinai, owa'. ¹⁵Gawa anama ina nafi'i heven, owa'. Nataga etap anae' ma opalef apimi maloma aman

aonai Satan atona. ¹⁶Emi egafis ukup mopoma esis etis si'i kowalas ma sofa' agof lu'wami ma amamaga maim hiami enis epesi, epes isima ina sape andeande', owa'. Esis ina sandatama sape etifigin saloma enis epes, owa'. Sanda' lopa' fitap etina sanda' waf naninani aonai.

¹⁷Ea' gawa nafi'i heveni nawalapa waf bu'unai na'ama. Waf nape nali'i, ukup epesi mope bo'om andeande'. Ea' waf bu'unai hianai wapoti' na'ama. Epes sape opalef awanema opalef etifim maloma enis epes. Ea' sanda' waf so'uso'umbilina'i sati uwahipis endilisi ea' sanda' waf bu'unai ma sagiambama enis epes. Esis ina malogof biam sa'i anom basef, owa'. Sa'i basef endilisi atom. Esis ina sanda' waf biefina sanifela enis sosambala enis, owa'. Esis ukup ma'i epes hiesi na'ama etin. ¹⁸Emi egafis sanda' maol sawalipa epesa sope opalef etifim isima si'i ape' mawa gwa'aimi aof. I'i esis sonda' maol anama ma waf opalef mape etifim, maol anama nowalapai waf bu'unai andeande' si'i gwa'aimi mataga bo'om aof.

Emi okom nainaila waf etapanai, enin nanda' naumbih naloma God

4 ¹Maina waf ofagena ma nanda' ipe' panda' lopa' fitap pape la'afena ipe'? Ukup awami atom mafela ipe' dei' panda' lopa' fitap la'ela'ef opalef nomon, alop ande' wapoti'. Ea' amama atom. ²Ipe' ukup ma'ima'i amamaga hiami mamumami ea' ipe' ina pefa'am, owa'. Ea' dei' ukup aom paha epes saga'. Ipe' gegelalasipa ma amamaga hiami enis epesi, ea' ipe' ina la'ifipa pefa'am, owa'. Ea' ipe' panda' lopa' fitapa pa'i pefa'am. Owa'etin. Dei' main, ipe' ina pahali' Goda amama, owa'.

³Nemaf anama ipe' panda' betena pefa' amamaga amama, ipe' ina pefa'am, owa'. Dei' main, ukup ipe'imi ina mape bo'om etifima pahali' God, owa'. Ipe' ukup ma'i pefa' amamaga penda'am pefa'am pekwahom amama ukup ipe'imi atom.

⁴Ipe' pakwaha waf Godi ea' pafe'ma waf aonai si'i amam nematawa sakwaha waf bu'unai dase'amainai ma sanda' waf aonai so'a waolanai. Ipe' pegawa amama. Emi egafis ukup maila waf etapanai, esis sanda' naumbih saloma God. Dei' pegawam. Emi egafis ukup maila waf etapanai, esis dei' sanda' naumbih saloma God. ⁵Ipe' ina pi'i basef Godi mail buk Baibeli falafumi, owa'. Basef amama ma'i na'ama ma'i, “Ambal anama napaipai God nase'apana nanda'apa ukup matamea ma mofa' amamaga mamumami hiami.”

⁶Ea' God nagiambamapa na'a nanda'apa mataga la'ifipa. Waf anama Godi nikila' waf aonai si'i basef mail Baibeli ma'iami,

“God nosambala epes isima sasambala basef Ananiami ea' nagiambama epes isima sanda' esis safe owina Anan.”

⁷Ea' dei' ipe' pefe' owina God. Ipe' pewa' alafugaha Satana anan nokwahipa nofa' nefe'. ⁸Ipe' pifi'i felefele' endilisi ma Goda Anan nifi'i felefele' endilisi ma ipe'. Ipe' panda' waf aonai, pekwaha waf

anama ipe' panda'anai si'i epes sasa'opa lagof asasimi mataga bo'om. Ipe' epes malogof biamipei, ipe' pekwaha waf anama ea' penda' ukup ipe'imi motaga bo'om. ⁹Ipe' panda' opalef ipe'imi aoma waf aonai ipe' panda'anai, pelef mehipa waf anama pekwahona ea' hapainai. Ipe' dei' panda' iafi, pemboma opalef pelef. Ipe' dei' pandanifel, ipe' penda' opalef ipe'imi aoma waf anama aonai. ¹⁰Ipe' pefe' owina Dembinai ma Anan nefelega nenda'epa petaga la'ifipa.

Ape' ina mowaloga sahin owan ape'isi ma basef awami, owa'

¹¹Ipe' ina piti waf sahin owan ipe'isi sanda'anai pi'i aona, owa'. Epen ni'i basef awamima enin alupini o newaloga sahin owan ananisi, epen inima enin na'i basef awami nawaloga mi'uli Godi. I'i ipe' pi'i basef awami pewaloga mi'uli anama, ina ata' paila mi'uli anama, owa'. Ea' pape si'i dembipei jas pawaloga mi'uli anama. ¹²God atona nawalapa mi'uli Ananinai ea' Anan atona jas nowaloga epes. Anan atona la'ifina ma nefa'apa mokwaha waf aonai ape' manda'anai motanimani ea' la'ifina ma nohapa wapoti'. Ea' dei' ipe' emi egafipa ma pi'i basef pewaloga epes isima sape felefele'ma ipe'? Na'ama hapaimi.

**Ape' ina mofela agof ape'imi ma maina maol
nambimb mi'i meanda'anai, owa'**

¹³Enipa ipe' pa'i na'ama pa'i, "Dei' o naman afa' ofe' wambel lu'unai taun ope onda' maola bisnis aflagol atotona ofa' otamba hiami."

Ipe' pa'iam na'ama, peme' basef ae'ami. ¹⁴Ipe' ina pegawa maim amamaga naman meatagamepa, owa'. Ambagof ipe'imi ata' mape namum la'ela'ef hihif? Ipe' si'i nogoh mataga mape nogota bandana mafe' hi'alam nemaf atotona. ¹⁵Ipe' ukup mi'i, "Okom Godi ni'i a'e, ope namofa onda' opeh amama o anom opeh."

Pi'iam na'ama, andeande'. ¹⁶Ea' dei' ipe' pa'i diga lu'unai pa'i ipe' etipa la'ifipei pafela agof ipe'imi atom. Waf anama na'amainai aona. ¹⁷Ipe' pegawa andeande'. Emi epen negawa ma nenda' waf bu'unai ma enin owa' nonda'ana, enin nanda' waf aonai.

Basefa epes amamaga hiamisi

5 ¹Ipe' amamaga hiamipei, ipe' peme' ae' dei' a'lipipa! Ipe' ukup mopoma nimanimi lu'wami anona nemaf motagama ipe' ea' pelef mehipe. ²Amamaga ipe'imi hiahaom sosaf maim ipe'imi pepe'atam mape ea' sopafowa matotopa' luwaguf maim ipe'imi hi'alam. ³Moni ipe'inai gol siliwa nowa'w nasagiham aom. Nowa'w anama si'i enin epen ni'ipipa waf aonai ipe' panda'anai nataga nandawalap. Ea' nowa'w anama nonda' alop ipe'inai si'i nif fandumi. Ipe' piwaniam hiahaom otamba maim ma nimeguf akutaimi motaga felefele'ma God nonda'mepa basef. ⁴Ipe' peme'.

Ipe' ina pase'am otamba amam manda' opeh mala' gwa'aimi aof ipe'inai, owa'. Ipe' pefa' otamba amamumi, pati amam malopa otamba amamumi. Amam malopa otamba amamumi ea' God la'ifinai ma amamaga hiami name' lef amamunai. ⁵Nogota ipe' pape etap anae', pe ipe'inai bo'ona pefa' amamaga bu'wami endilisi pa' gwa'aimi hiami manda'epa pataga lu'ulu'upa. Ea' nemaf anama si'i saha mafis lu'wami anona nemaf notaga nehapa. ⁶Ipe' panda' basef baso'omaimi pambaso'ma epes bu'wasi pahas saga'. Ea' epes isima basef a'as. Ina sagwamepa wandaf, owa'.

Ipe' pitu la'ifipa pefa' nimanimi pehafa Dembinai notanimani

⁷Sahin owan ae'ipei, ipe' pitu la'ifipa opalef awanem pehafa nemaf anama Dembinai niefi'ianai. Ipe' ukup mopoma anona aman nafomona aofi. Anan nohafa anona nemaf gwa'aimi bu'wami sotalom otamba hiami notaga. Anan opaf awanena naitu la'ifina nape nohafa nogota laona ma asaf nilai nonda' gwa'aimi hiami motaga aof ananinai. ⁸Ipe' wapoti' penda' opalef ipe'imi la'ifim ea' pepe opalef awanem. Dei' main, nemaf Dembinai notanima niefi'ianai felefele' notaga. ⁹Ipe' ina piti waf sahin owan ipe'si sanda'anai pi'i aona, owa'. Na'ama anona nemaf God nowaloga ipe'. Jas nape felefele'ma uta. ¹⁰Sahin owan ae'ipei, ipe' ukup mopoma amam profet fowa' mawalipasa basef Godi ma agel Dembinai. Amam opalef awanem maitu la'ifima nimanimi lu'wami matagamami. ¹¹Ape' ukup ma'i amam maitu la'ifim dei' ma'i amam mandanifel.

Ipe' pegawa aman anama Jop. Anan naitu la'ifina opaf awanena ma nimanimi matagamana. Nape la'ela'ef nogota laona, Dembinai nagiambamana. Dembinai na'i uwahipipa ape' endilisi ea' okom nainailapa.

Ape' ina mi'i basef endilisimi gani ilif, owa'

¹²Ipe' sahin owan ae'ipei, basef mali'i ipe' pielami amama. Ipe' owa' pi'i heven ilif o etap anae' o anom amamaga penda' basef ipe'imi mataga la'ifimi, owa'. Ipe' ina penda' basef ipe'imi la'ifimi endilisimi pi'i gani ilif, owa'. Ipe' ukup mi'i, "A'e" pi'i, "A'e". Ipe' ukup mi'i, "Owa'", pi'i, "Owa'". Ama God ina nowaloga ipe' ma basef amama ipe'imi.

Beten anama epes bu'wasi sanda'anai, anama la'ifina

¹³I'i enin epen ipe'ini nefa' nimanimi, enin nenda' beten nihali' God. I'i enin epen nendanifel, enin nenda' awalefa nefela agel Godi. ¹⁴I'i enin epen ipe'ini awen, enin nefala amam agufumi siosi mifi'i monda'man beten mohali' God ea' mokolo'wa wel bu'wami alop ananinai ma agel Dembinai. Ama nonda' epen inima bo'wen. ¹⁵I'i amam mombale'ef endilisi ma monda' beten mohali' God, epen inima netaga bo'wen. Dembinai nigiambaman netaga bo'wen. I'i epen inima nali' nenda' waf

aonai, God nokwaha waf aonai enin nanda'anai. ¹⁶Amama atom dei' ipe' pewalapa waf aonai ipe' panda'anai atona etin ea' penda' beten ama ipe atona etina God nonda'epa bo'wepa. I'i enin epen bo'wen, beten ananinai la'ifina endilisi.

¹⁷Aman anama Elaija fowa'inai, anan aman si'i ape' epes mape etapi. Anan okom napoma God ea' nanda' beten nahali'ana ma nasopama asaf, ea' ina nalai etap asasinai nogota laona afagof si'imi wanom tu'waninai. ¹⁸Afagof amama mafe'ma ea', nanda' beten nahali' God wapoti', otaga akutina asaf nalai gwa'aimi mataga etap malo andeande' wapoti'.

I'i enin epen nekwaha bale'ef ananinai, ape' migiambaman

¹⁹Sahin owan ae'ipei, i'i enin epen ipe'ini nekwaha nembale'efa basef endilisimi Godi, ma enin epen nigiangbaman nefa'an nitanimani, ipe' ukup mopoma basef amama. ²⁰Emi egafis sagiangbama epen nanda' waf aonai ma nekwaha waf enin nanda'anai nitanimani, epes isima sagiangbamani sefa'an natanimani nakwaha neaga'. Amama atom God dei' nakwaha waf aonai hianai enin nanda'anai.